

Kapisilinniarneq pillugu Namminersorlutik Oqartussat nalunaarutaat

Aalisarneq pillugu Inatsisartut Inatsisaanni nr. 18, 31. oktober 1996-imeersumi, § 5, § 8, § 10, § 10a, imm. 1, § 13, imm. 2, § 23, § 25, § 26, § 33, imm. 2 aamma § 34, imm. 3, ilaatigut Inatsisartut inatsisaanni nr. 6, 20. maj 1998-imeersukkut, Inatsisartut inatsisaanni nr. 5, 21. maj 2002-meersukkut, Inatsisartut inatsisaanni nr. 28, 18. december 2003-meersukkut, Inatsisartut Inatsisaanni nr. 17, 3. december 2009-meersukkut, Inatsisartut Inatsisaanni nr. 12, 3. december 2012-imeersukkut kingullermillu Inatsisartut Inatsisaat nr. 18, 3. juni 2015-meersooq aqqutigalugu allangortinneqarsimasut tunngavigalugit aalajangersarneqarpoq:

Atuuffia

§ 1. Nalunaarut kapisilinniarnermut imartani Kalaallit Nunaata aalisarnikkut oqartussaaffigisaani Nunap Isuata kitaani NAFO-p sumiiffilersuiffiani 1-imi ingerlanneqartumut atuuppoq. Tunngaviumik killigititami 40 sømilit avataanni aalisarneq inerteqqutaavoq.

Imm. 2. Kalaallit Nunaata Kangiata aalisarfiini kapisilinniarnermi malittarisassat nalunaarummi § 5, § 6, § 7, § 8, aamma § 9-mi taaneqartut atuupput. Tunngaviumik killigititami 12 sømilit avataanni kapisilinniarluni aalisarneq inerteqqutaavoq.

Imm. 3. Nalunaarut aammattaq kapisilinnik pisinerup tunisinerullu nalunaarutigineqarnerinut kiisalu inuussutissarsiummut atatinnagu kapisilinniarnermi pisat nalunaarutigineqarnerinut atuuppoq.

Nassuiaatit

§ 2. Inuussutissarsiutigalugu kapisilinniarneq nalunaarummi matumani paasineqassaaq pisat tamaasa ilaannaasaluunniit tuniniarnissaat siunertaralugu kapisilinniarnertut. Inuussutissarsiutigalugu kapisilinniarnissamut akuersissummik allagartallit kisimik kapisilinnik tuniniaasinnaatitaapput.

Imm. 2. Inuussutissarsiummut atatinnagu kapisilinniarneq nalunaarummi matumani paasineqassaaq nammineq atugassanik kapisilinniarnertut.

Imm. 3. Kapisilinnik pisineq nalunaarummi matumani paasineqassaaq inunnit kapisilinniarnissamut akuersissummik allagartaqartunit toqqaannartumik pisineq tiguserlu.

Imm. 4. Piffissaq aalisarfusooq nalunaarummi matumani paasineqassaaq piffissatut imaluunniit piffissat ilaattut kapisilinniarinnaatitaaffittut.

Imm. 5. Pisassat ilaat nalunaarummi matumani paasineqassaaq pisassat tamarmiusut piffissami aalisarfusumi piffissami aalajangersimasumi inunnilluunniit aalajangersimasunit aalisarneqarsinnaasut imm. 1 aamma 2 takukkit.

Inuussutissarsiutigalugu kapisilinniarnermut piumasaqaatit

§ 3. Akuersissummik allagartamik tunineqartut kisimik inuussutissarsiutigalugu kapisilinniarsinnaatitaapput. Inuussutissarsiutigalugu kapisilinniarsinnaanermut allagartat akuersissutit Naalakkersuisunit tunniunneqassapput.

Imm. 2. Allagartat akuersissutit qinnuteqartunut piumasaqaatinik makkuninnga naammassinnittunut tunniussisoqarsinnaavoq:

- 1) Inuiaqatigiinnut kalaallinut attuumassuteqavissunut, tak. aalisarneq pillugu Inatsisartut inatsisaanni § 3, imm. 4.
- 2) Qassutitik kapisilinniutitik aamma angallammik kapisilinniummik 12,8 meterit (42 fod) tikillugit tamakkerlugu angissusilimmik nammineq pigisaqartunut.
- 3) Qinnuteqarnermut atatillugu qinnuteqartumit pigineqartut qassutit kapisilinniutit qassiunerinik qanorlu ittuunerinik imaluunniit ilisarnaataannik nalunaaruteqartumut.

Inuussutissarsiutigalugu kapisilinniarnermi piniutit

§ 4. Inuussutissarsiutigalugu kapisilinniarneq qarsorsat qassutilluunniit tasillugit 140 mm-inik nigartallit atorlugit taamaallaat ingerlanneqassaaq. Qassutit tissukartittakkat atorneqarsinnaapput, taamaattorli atuinermi ataatsimi amerlanerpaamik uiguleriit 20-kkuutaarlugit.

Imm. 2. Qassutit nigartaat uuttorneqassapput uuttuutit $\frac{1}{2}$ kiilumik oqimaalutserlugu nigartamut ikkuneratigut nakkartinneratigullu. Qimiaa puttalatitsisoq atuarlugu nigartat 20-t qimiaanut ungaseqatigiit uuttorneqassapput. Nigartat tamarmik imm. 1-imi piumasaqaat eqquutsissavaat.

Imm. 3. Qassutit kapisilinniutit atorneqartut tamarmik piginnittup aqqanik imaluunniit taassuma angallataata normuanik nalunaaqutsersugaassapput. Nalunaaqutsiinermi atorneqartoq imermi allannguajaatsuusaaq.

Imm. 4. Silap pissusaata taamaattoqartissinnaappagu qassutit kapisilinniutit akuttunngitsumik akulikitsumillu qassusiarfigineqartassapput, pisat uumanissaminnut periarfissaat ajornerulertussaajunnaarlugit.

Imm. 5. Qassutit tissukartittakkat nalinginnartut nalunaaqutsigaallutillu qulleqassapput

Inuussutissarsiutigalugu kapisilinniarnep aqunneqarnera

§ 5. Inuussutissarsiutigalugu kapisilinniarneq pisassiissutit aallaavigalugit nunami tunitsivinnut tunisassanik kiisalu / imaluunniit najukkani kalaalimineerniarfinnut akunnittarfinnullu, neriniartarfinnut, napparsimavinnut, ilinniartut najugaqarfiinut pisortallu nerisitsisarfiinut allanut tuniniarneqartussanik aalisarnertut ingerlanneqarsinnaavoq.

§ 6. Aalisarnermut, tak. § 5, Naalakkersuisut ukiut tamaasa, nunat tamalaat akornanni isumaqatigiissutit aallaavigalugit, Kitaani kapisilittassanik aalajangersaasassapput. Pisassat pisassanut immikkoortiterneqarsinnaapput piffissap ilaani aalisarneqarsinnaasutut agguataarneqarsinnaallutik.

Imm. 2. Naalakkersuisut KNAPK-lu isumasioqatigereerlugu inuussutissarsiutigalugu kapisilinniarnissamut piffissat ilaannut ataasiakkaanut ulloq aallartiffissaq aalajangertassavaa. Piffissat ilaannut ataasiakkaanut ulloq aallartiffissaq kommuninut ataasiakkaanut, KANUKOKA-mut, KNAPK-mut kiisalu nuna tamakkerlugu tusagassiorfiit aqutigalugit nalunaarutigineqassaaq.

Imm. 3. Inuussutissarsiutigalugu kapisilinniarneq piffissat ilaannut ataasiakkaanut ulloq aallartiffissatut aalajangerneqartoq sioqqullugu aallartinneqassanngilaq aammalu piffissaliussat ilaasa ataasiakkaat naanerisigut unitsinneqarluni imaluunniit pisassat nungunneqarpata.

Imm. 4. Inuussutissarsiutigalugu kapisilinniarneq taamaallaat pisassatut aalajangerneqartut, aalisakkat uumatillutik uuttuutaattut (ilivitsuutillugit) kiilunngorlugit taaneqartut, iluanni pisinnaavoq.

Imm. 5. Inuussutissarsiutigalugu kapisilinniarnermi pisat Kalaallit Nunaata avataani taamaallaat pisiariortorneqarsinnaapput tuniniarneqarsinnaallutillu Naalakkersuisut akuersissuteqarnerisigut.

§ 7. Kapisilittassiissutit aalajangikkat tamakkerlugit pisarineqarnissaat qanillippat, Naalakkersuisut nalunaarutigissavaat, qaqugu inuussutissarsiutigalugu kapisilinniarneq kiisalu taamatut aalisarnermit pisanik pisineq aamma tunisineq unissanersaq.

Imm. 2. Tamanna kommuninut ataasiakkaanut, KNAPK-mut KANUKOKA-mullu aammalu nuna tamakkerlugit tusagassiorfiit aqqutigalugit nalunaarutigineqassaaq.

Imm. 3. § 6, imm. 3 naapertorlugit aalisarnermi unippat, inuussutissarsiutigalugu kapisilinniarneq sunaluunniit kiisalu aalisarnermit tamatumannga pisineq tunisinerlu inerteqqutaapput.

Inuussutissarsiutigalugu kapisilinniarnermi pisanik nalunaaruteqartarneq

§ 8. Kapisillit pisarineqartut tamarmik Kalaallit Nunaanni Aalisarnermik Akuersissutinik Nakkutilliisoqarfimmut (KANUAANA) nalunaarutigineqassapput.

Imm. 2. Tunisat imaluunniit akigineqartut amerlassusii "niaquernagit erlaveerlugit" nalunaarutigineqarpata naatsorsueriaaseq 1,11 atorineqassaaq aalisakkat ilivitsunngortillugit naatsorsorneranni.

Imm. 3. Aalisartut inuussutissarsiutigalugu kapisilinniarnissamik akuersissummik allagartamik pillit, toqqaannartumik kalaalimineerniarfinni tunisisartut imaluunniit toqqaannartumik pisisartumut kalaalimineerniarfiit avataanni tunisaqartartut kapisilinnik tulaassinitik tamaasa nalunaarutigisassavaat. Nalunaaruteqarnermi kapisillit ataatsikkut tulaanneqartut tamakkerlugit nalunaarutigineqassapput. Pisat pillugit nalunaarutiginninneq nalunaarummi ilanngussaq 1 atorlugit pisassaaq. Pisat pillugit nalunaarutiginninissaq uunga nassiuqqassaaq: KANUAANA, Postboks 501, 3900 Nuuk, Telefax 34 63 60 imaluunniit e-mail-ikkut uunga gflk@nanog.gl. Nalunaarutiginninneq kapisilinnik tulaassinerup kinguninngua pisassaaq.

Inuussutissarsiummut atatinnagu kapisilinnik aalisarnerq

§ 9. Inuussutissarsiummut atatinnagu pisassiissutit aalajangersarneqartut iluanni kapisilinnik aalisarnerq takujuk § 5, danskit naalagaaffianni innuttaassuseqartunit Kalaallit Nunaanni najugaqavissunit ingerlanneqassaaq, tak. Aalisarnerq pillugu Inatsisartut inatsisaanni § 8, imm. 1. Nunani allani Danmarkinngitsumi innuttaassusillit Kalaallit Nunaanni najugaqavissut ukiullu kingulliit marluk ataavartumik Kalaallit Nunaanniissimasut danskisut innuttaassuseqartut pineqassapput.

Imm. 2. Inuussutissarsiummut atatinnagu kapisilinnik aalisarnerq piffissap Naalakkersuisunit aalajangersarneqartup iluinnaani inuussutissarsiutigalugu aalisarnerq pisinnaavoq.

Imm. 3. Inuussutissarsiummut atatinnagu kapisilinniarnermi qarsorsat qissattaatillu kisimik atorineqassapput kiisalu qassutit (ataatsit) 2000-inik nigartallit, taakkua tasillugit nigartaat minnerpaamik 140 mm-iusut.

Imm. 4. Qassutit nigartaat uuttorneqassapput aalisarnermik nakkutilliisut uuttuutaata ½ kiilumik oqimaalutserlugit nigartamut ikkuneratigut nakkartinneqatigullu. Qimiaa puttalatitsisoq atuarlugit nigartat 20-t qimiaanut ungaseqatigiit uuttorneqassapput. Nigartat tamarmik imm. 1-imi piumasaqaat eqqortissavaat.

Imm. 5. Qassutit kapisilinniutit atorineqartut tamarmik piginnittup aqqanik imaluunniit taassuma angallataata normuanik nalunaaqutsersugaassapput. Nalunaaqutsiinermi atorineqartoq imermi allannguajaatsuusaaq.

Imm. 6. Silap pissusaata taamaattoqartissinnaappagu qassutit kapisilinniutit akuttunngitsumik akulikitsumillu qassusiarfigineqartassapput, pisat uumanissaminnut periarfissaat ajornerulertussaajunnaarlugit.

Inuussutissarsiummut atatinnagu kapisilinnik aalisarnermit pisanik nalunaaruteqartarnek

§ 10. Inuussutissarsiummut atatinnagu kapisilinnik aalisarnermi kapisillit pisarineqartut tamarmik KANUAANA-mut nalunaarutigineqassapput.

Imm. 2. Pisat pillugit nalunaarutiginninneq nalunaarummi ilanngussaq 1 atorlugu pisassaaq. Pisat pillugit nalunaarutiginninnissaq uunga nassiunneqassaaq KANUAANA, Postboks 501, 3900 Nuuk, Telefax 34 63 60 imaluunniit e-mail-ikkut uunga gflk@nanoq.gl. Pisanik nalunaarutiginninneq qassutinik alakkaareerluni tikinnerit kinguninngua pisassaaq, takujuk § 9 imm. 6.

Pineqaatissiissutit

§ 11. § 2, imm. 1, 2. pkt., § 3, imm. 1, § 4, imm. 1, aamma imm. 3, § 6, imm. 3, 4 aamma 5, § 7, imm. 3, § 8, § 9 aamma § 10-mik unioqqutitsinerit Kalaallit Nunaanni Pinerluttulerinermik Inatsit naapertorlugu akiliisitsinermik kinguneqarsinnaapput. Akiliisitsineq Nunatta Karsianut tutsinneqassaaq.

Imm. 2. Inatsilerinermi immikkoortut inuttut isigineqarsinnaasut pinerluttulerinermut inatsimmi malittarisassat malillugit imm. 1-imut ilaapput.

Imm. 3. Pinerluttulerinermik inatsimmi arsaarinnittarnek pillugu malittarisassat atuupputtaa.

Atortuulersitsineq

§ 12. Nalunaarut manna 12. oktober 2015 atuutilerpoq. Tamatuma peqatigisaanik kapisilinniarnek pillugu Namminersorlutik Oqartussat nalunaarutaat nr. 15, 13. august 2015-imeersoq atorunnaarpoq.

Namminersorlutik Oqartussat, ulloq 9. oktober 2015

Karl-Kristian Kruse

/

Jørgen Isak Olsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut